

現代生活藝術系列

華嚴經疏論纂要 48

——十迴向品之二

華藏淨宗學會印贈

大方廣佛華嚴經疏論纂要卷第四十八

五臺山清涼國師澄觀疏鈔

太原方山長者李通玄論

闕鼓山私淑比丘道霈纂要

十迴向品第二十五

之二

○第二不壞迴向。長行中二。先位行。後位果。位行
中三。謂標。釋。結。今初標名徵起

佛子。云何爲菩薩摩訶薩不壞迴向

〔疏〕謂於諦寶等十種勝境深信堅固得不壞名。然
十表無盡。信通事理。故本業云。觀一切法。但有用

但有名。念念不住。故名不壞。是知善根迴向皆通
事事無礙。方真不壞耳。鈔故本業云下。證通事理。但有各用事也。念念不住。故名不壞者。單取不住。即是利那無常。合是壞義。以無所住。故名不住。則是理不壞義耳。準下供具等。皆通事。

〔論〕第二不壞迴向。以戒波羅密爲體。餘九爲伴。善財以船師號婆施羅爲表行。行之人此云自在。在樓閣城城門外海岸上。修大悲幢行法門。明此迴向位中。以大悲爲戒體。視一切生歿之海。令得一切大智之海。居生歿海而得自在。故名自在。廣說如經。又表戒體如海。性淨不宿歿屍。明法身本淨。

不宿煩惱染淨灰屍也。廣義如文。

○第二依徵廣釋中。三初舉所迴善根。二辨迴向之行。三明迴向所爲。今初分二。先明起不壞信。後佛子下。依信種善。今初。

佛子。此菩薩摩訶薩。於去來今諸如來所得不壞信。悉能承事一切佛故。於諸菩薩乃至初發一念之心。求一切智得不壞信。誓修一切菩薩善根。無疲厭故。於一切佛法得不壞信。發深志樂故。於一切佛教得不壞信。守護住持故。於一切衆生得不壞信。慈眼等觀善根。迴向普利益故。於一切白淨法得不壞信。普

集無邊諸善根故。於一切菩薩迴向道得不壞信。滿足殊勝諸欲解故。於一切菩薩法師得不壞信。於諸菩薩起佛想故。於一切佛自在神通得不壞信。深信諸佛難思議故。於一切菩薩善巧方便行得不壞信。攝取種種無量無數行境界故。

疏初十句。不出三寶四信。初句佛寶。次句僧寶。餘皆法寶。於中初句是總兼合理法。餘七句別別中。初一教法。次四行法。一大悲行。二惡止善行。行亦攝於戒。三迴向行。四近友行。次一果法。後一重舉行法。意欲總包其中理法。卽信真如。鈔不出三寶四信者。四信

卽三寶外加一。然二文不同。若起信論卽是真如。故彼論修行信心分云。畧說信有四種。一者信根。本所謂樂念真如法。故二者信佛。有無量功德。常樂親近。供養恭敬。發起善根。願求一切智。故三者信法。有大利益。常念修行。諸波羅密。故四者信僧。能正修行。自利利他。常樂親近。諸菩薩衆。求學如實行。故故下疏云。其中理法卽信真如。二若準瓔珞下卷四。不壞信。前三是三寶。四是正戒。云從今時盡未來際。歸依佛。歸依法。歸依賢聖僧。歸依戒法。如是言說。故疏云。一惡止善行。行亦攝於戒。意取戒爲第四信。故四既不定。爲十何爽。

○第二依信種善根

佛子。菩薩摩訶薩。如是安住不壞信時。於佛菩薩聲聞獨覺。若諸佛教。若諸衆生。如是等種種境界中。種諸善根。無量無邊。令菩提心轉更增長。慈悲廣大。平

等觀察。隨順修學諸佛所作。攝取一切清淨善根。入真實義。集福德。行大惠施。修諸功德。等觀三世。

〔疏〕先種善根。後令菩提下。長菩薩道。有十句。初總餘別。可知。初舉所迴善根竟。

○第二明迴向。行中二。先將善根迴向。後將勝報迴向。前中卽雙向衆生菩提。

菩薩摩訶薩。以如是等善根功德。迴向一切智。願常見諸佛。親近善友。與諸菩薩同共止住。念一切智心。無暫捨。受持佛教。勤加守護。教化成熟。一切衆生。心常迴向出世之道。供養瞻侍一切法師。解了諸法憶。

持不忘。修行大願。悉使滿足。菩薩如是積集善根。成就善根。增長善根。思惟善根。繫念善根。分別善根。愛樂善根。修習善根。安住善根。

疏文二。初正明迴向。一結成。先總明迴向菩提之果。願常下。別明迴向。成得果之因。文有十句。初三行緣。次二行因。後五所成之行。初成利他行。卽迴向衆生意。次三自利。後一通二利。鈔前中卽雙向。向一切智。故是菩提。次下教化調伏一切衆生等。卽向衆生。故下疏云。卽迴向衆生意。二如是積集下。結成中九句。前三通顯收攝。亦是聞慧。一積一至多。二令至究竟。三隨一使增。次四皆思。

慧後二修慧起行爲修習相應爲安住

○二將勝報迴向。謂依迴向得報。復將迴向。通向三處文中二。先明所迴善根。二如是修集無量功德下。顯迴向行。今初又二。先結前生後

菩薩摩訶薩。如是積集諸善根已。以此善根所得依果修菩薩行。

○二正明供佛善根。於中又二。先總標。後以阿僧祇下。廣顯。今初

於念念中。見無量佛。如其所應。承事供養。

〔疏〕言如其所應者。有二義。一隨何所要。如應卽供。

二稱佛境界所應之供。謂不以稱法界之供。不能
供稱法界之佛故。

○二廣顯中四。一廣列供事。二明供佛。三顯供意。
四結分齊。今初廣列供事。有六十七句。爲六。初
二十句雜門。明內外之供。下皆純門。

以阿僧祇寶。阿僧祇華。阿僧祇鬘。阿僧祇衣。阿僧祇
蓋。阿僧祇幢。阿僧祇幡。阿僧祇莊嚴具。阿僧祇給侍。
阿僧祇塗飾地。阿僧祇塗香。阿僧祇末香。阿僧祇和
香。阿僧祇燒香。阿僧祇深信。阿僧祇愛樂。阿僧祇淨
心。阿僧祇尊重。阿僧祇讚歎。阿僧祇禮敬。

疏可知

○二座

阿僧祇寶座。阿僧祇華座。阿僧祇香座。阿僧祇髮座。
阿僧祇梅檀座。阿僧祇衣座。阿僧祇金剛座。阿僧祇
摩尼座。阿僧祇寶繒座。阿僧祇寶色座。

○三經行處

阿僧祇寶經行處。阿僧祇華經行處。阿僧祇香經行
處。阿僧祇髮經行處。阿僧祇衣經行處。阿僧祇寶間
錯經行處。阿僧祇一切寶繒綵經行處。阿僧祇一切
寶多羅樹經行處。阿僧祇一切寶欄楯經行處。阿僧

祇一切寶鈴網彌覆經行處

○四宮殿

阿僧祇一切寶宮殿。阿僧祇一切華宮殿。阿僧祇一切香宮殿。阿僧祇一切髮宮殿。阿僧祇一切梅檀宮殿。阿僧祇一切堅固妙香藏宮殿。阿僧祇一切金剛宮殿。阿僧祇一切摩尼宮殿。皆悉殊妙出過諸天

○五樹

阿僧祇諸雜寶樹。阿僧祇種種香樹。阿僧祇諸寶衣樹。阿僧祇諸音樂樹。阿僧祇寶莊嚴具樹。阿僧祇妙音聲樹。阿僧祇無厭寶樹。阿僧祇寶繒絲樹。阿僧祇

寶璫樹。阿僧祇一切華香幢幡鬘蓋所嚴飾樹。如是等樹。扶踈蔭映莊嚴宮殿。

○六嚴宮殿亦純雜無礙

其諸宮殿。復有阿僧祇軒檻莊嚴。阿僧祇窻牖莊嚴。阿僧祇門闥莊嚴。阿僧祇樓閣莊嚴。阿僧祇半月莊嚴。阿僧祇帳莊嚴。阿僧祇金網彌覆其上。阿僧祇香周巾普熏。阿僧祇衣敷布其地。

疏可知 上來廣列供事竟

論三菩薩如是已下。至阿僧祇衣敷布其地。有十三行經。明舉依果報嚴分。釋義云。如是阿僧祇

寶是本。行中以法利生。依果也。阿僧祇華者。是以行能利自他。開敷衆善之依果。阿僧祇鬘。是忍所報也。阿僧祇衣。從慚愧生也。阿僧祇蓋。大慈悲所生也。阿僧祇幡。迴向心所生也。阿僧祇幢。是隨行不退力所生也。阿僧祇莊嚴具。諸助道法所生也。阿僧祇侍從。謙敬離慢所生也。阿僧祇塗飾地。從戒品生也。阿僧祇塗香。以戒徧諸法生也。阿僧祇栴香。以往昔散華香報所生。大綱以行知果。如影隨形。一一相似。准物類以義解之。可解。亦以昔曾以如是物供養佛法僧。獲得斯果故。餘准此知之。

○二明供佛

佛子。菩薩摩訶薩。以如是等諸供養具。於無量無數不可說不可說劫。淨心尊重恭敬供養一切諸佛。恒不退轉。無有休息。一一如來滅度之後。所有舍利。悉亦如是恭敬供養。

〔疏〕先供現佛。後一一下。明供舍利。

○三明供意

爲令一切衆生。生淨信故。一切衆生。攝善根故。一切衆生。離諸苦故。一切衆生。廣大解故。一切衆生。以大莊嚴而莊嚴故。無量莊嚴而莊嚴故。諸有所作。得究

竟故。知諸佛興難。可值故。滿足如來無量力故。莊嚴
供養佛塔廟故。住持一切諸佛法故。

〔疏〕有十一句。可知。

○四結供分齊。

如是供養現在諸佛。及滅度後所有舍利。其諸供養。
於阿僧祇劫說不可盡。

〔疏〕謂非唯如上所列。故云不可盡。

○第二顯迴向行中三。初迴向之心。二迴向之相。

三迴向行成。今初。

如是修集無量功德。皆爲成熟一切衆生。無有退轉。

無有休息。無有疲厭。無有執著。離諸心想。無有依止。
永絕所依。遠離於我。及以我所。如實法印。印諸業門。
得法無生。住佛所住。觀無生性。印諸境界。諸佛護念。
發心迴向。

〔疏〕文中有三。初不離大悲。兼迴向衆生之意。次無
有執著下。離妄契真。卽離相之意。後諸佛下。結前
生後。

○二迴向之相

與諸法性相應迴向。入無作法成就所作方便迴向。
捨離一切諸事想著方便迴向。住於無量善巧迴向。

永出一切諸有迴向。修行諸行不住於相善巧迴向。普攝一切善根迴向。普淨一切菩薩諸行廣大迴向。發無上菩提心迴向。與一切善根同住迴向。滿足最上信解心迴向。

〔疏〕兼顯迴向菩提。於中有十一句。前六離相。後五隨相。

○三迴向行成。於中三。初隨相行成。二以清淨下離朴行成。三菩薩如是善巧下。雙結二行無礙。今初。

佛子。菩薩摩訶薩。以諸善根如是迴向時。雖隨生死。

而不改變。求一切智。未曾退轉。在於諸有心無動亂。悉能度脫一切衆生。不染有爲法。不失無礙智。菩薩行位。因緣無盡。世間諸法。無能變動。具足清淨。諸波羅蜜。悉能成就。一切智力。菩薩如是。離諸癡暗。成菩提心。開示光明。增長淨法。迴向勝道具足衆行。

〔疏〕有三。初牒前。由前離相。非唯不礙隨相。亦能成

此隨相。

鈔非唯不礙等者。不礙者。如空不礙萬象。能成者。如無水卽無可爲波。亦如無空不

能生起雲霞煙霧。不礙卽相徧門能成。卽相成門卽理成事。以有空義故。一切法得成也。次雖

隨下正顯文有十句。一由前法性相應故。隨生灰而不變。二以入無作成所作故。求一切智未曾退

轉三由捨離想著故。諸有不動。四住多善巧。能度
衆生。五永出諸有故。不染有爲。六修行不住相故。
不失無礙智。七普攝善根故。因緣無盡。八普淨大
願故。世法不動。九發菩提心故。具修諸度。十由善
根同住故。具足十力。如次配土。由前法性等者。正
辨離相。成隨相也。
此句猶與法性相應。故是離相。故法性卽是真如。
眞如隨緣。故能成事。不失不變。故而不改。下九例
然細尋前十。一
一相對可知。後菩薩如是下。結前生後。卽由前
最上信解心生。

○二明離相行成

以清淨意。善能分別。了一切法。悉隨心現。知業如幻。

業報如像。諸行如化。因緣生法悉皆如響。菩薩諸行一切如影。出生無著清淨法眼。見於無作廣大境界。證寂滅性了法無二。得法實相。具菩薩行。於一切相皆無所著。善能修行同事諸業。於白淨法恒無廢捨。離一切著。住無著行。

〔疏〕由前事不礙理。故觸境了如。鈔由前等者。前之十句離相成於隨

相者。由理不礙事故。今成離相。由前事不礙理。上總釋意。於中初一句總。了一

切下別。別中初唯心觀成。次知業下。緣生無性觀

成。次出生下。法眼了真。具菩薩下。妙行無著。亦如

次配前一了心性故。亦如次配前者。從頭別釋。即配前與諸法性相應。迴向人

無作法成就所作迴向等十句。而前隨相行成舉
 前迴向離相為能成隨相為所成。故前云由前法
 性相應。故隨生。歎流而不變等。今此則舉前隨相
 不礙。成此離相。若事礙理。不即離。故近躡前事。亦
 遠躡前離。相謂由前迴向與法。二業無作故。前入
 性相應。故今成了心性之行。二業無作故。前入
 無所作法成就所作。三不起想故。三由前捨離一
 故成此知業如幻等。四行善巧故。四由任於無量善巧
 成此中出生無等。四行善巧故。四由任於無量善巧
 著清淨法眼等。五諸有緣生故。五由前永出一切諸有故。六行無
 住故。六由前修行諸行不住於相。七菩提性無著故
 七由前菩提攝一切善根故。八諸行廣大故。八由前
 成此於白淨法。恒無廢捨。八諸行廣大故。八由前
 切菩薩諸行廣大迴。九了菩提性無有二唯。一實
 向故成此離一切著。九了菩提性無有二唯。一實
 故。九由前發無上菩提心故。成此離一切著。此十
 句難解。故疏云。了菩提性無有二唯。一實故。十

由與善根同住故。能具菩薩行。十由前與一切善根同住故。任無著

行。十一由最上信解故。於無漏白法。無有廢捨。若

通由前。則易可知。十一由最上信解等。即前第十

淨法。兩重用之。第七已用故。

○三雙結二行無礙以成迴向

菩薩如是善巧思惟。無有迷惑不違諸法。不壞業因。明見真實。善巧迴向。知法自性。以方便力。成就業報。到於彼岸。智慧觀察一切諸法。獲神通智。諸業善根。無作而行。隨心自在。

疏初總明不迷理惑事。故名善巧思惟。後不違下

別皆事理無礙可知

第二辨迴向之行竟

○第三迴向所爲

菩薩摩訶薩。以諸善根如是迴向。爲欲度脫一切衆生。不斷佛種。永離魔業。見一切智。無有邊際。信樂不捨。離世境界。斷諸雜染。亦願衆生得清淨智。入深方便。出生死法。獲佛善根。永斷一切諸魔事業。以平等印。普印諸業。發心趣入一切種智。成就一切出世間法。佛子。是爲菩薩摩訶薩第二不壞迴向。

〔疏〕初句總明。後不斷下別顯。於中前離魔業。通一切惡。後魔事業。通一切相。但違法印。皆魔事故。故

下釋云。以平等印。普印諸業。則離魔也。餘句可知。
○第二位果

菩薩摩訶薩。住此迴向時。得見一切無數諸佛。成就無量清淨妙法。普於衆生。得平等心。於一切法。無有疑惑。一切諸佛神力所加。降伏衆魔。永離其業。成就生貴滿菩提心。得無礙智。不由他解。善能開闡一切法義。能隨想力。入一切刹。普照衆生。悉使清淨。菩薩摩訶薩。以此不壞迴向之力。攝諸善根。如是迴向。

疏亦如十地調柔等果文中。初牒得時。次得見下。正辯果相。後菩薩下總結所屬。

○第二偈頌

爾時金剛幢菩薩承佛神力普觀十方卽說頌言

菩薩已得不壞意 修行一切諸善業

是故能令佛歡喜 智者以此而迴向

供養無量無邊佛 布施持戒伏諸根

爲欲利益諸衆生 普使一切皆清淨

〔疏〕二十五偈分三初二頌所迴善根及第一節迴

向次十八偈頌所成供行復將迴向後五偈頌迴

向所爲

一切上妙諸香華 無量差別勝衣服

寶蓋及以莊嚴具

供養一切諸如來

如是供養於諸佛

無量無數難思劫

恭敬尊重常歡喜

未曾一念生疲厭

專心想念於諸佛

一切世間大明燈

十方所有諸如來

靡不現前如目覩

不可思議無量劫

種種布施心無厭

百千萬億衆劫中

修諸善法悉如是

彼諸如來滅度已

供養舍利無厭足

悉以種種妙莊嚴

建立難思衆塔廟

造立無等最勝形

寶藏淨金爲莊嚴

巍巍高大如山王

其數無量百千億

淨心尊重供養已

復生歡喜利益意

不思議劫處世間

救護衆生令解脫

了知衆生皆妄想

於彼一切無分別

而能善別衆生根

普爲羣生作饒益

疏二。中亦一。前八頌所迴善根

菩薩修集諸功德

廣大最勝無與比

了達體性悉非有

如是決定皆迴向

以最勝智觀諸法

其中無有一法生

如是方便修迴向

功德無量不可盡

以是方便令心淨 悉與一切如來等

此方便力不可盡 是故福報無盡極

發起無上菩提心 一切世間無所依

普至十方諸世界 而於一切無所礙

〔疏〕後十頌迴向之行。文中二初四頌迴向之心

一切如來出世間 爲欲啓導衆生心

如其心性而觀察 畢竟推求不可得

一切諸法無有餘 悉入於如無體性

以是淨眼而迴向 開彼世間生死獄

〔疏〕次二頌迴向之相

補註曰：此偈八句。首二句明諸佛出世之意。謂佛出不爲別事。唯爲啓發開導衆生之心。衆生者。凡夫二乘也。凡夫心住生死。曠劫沉淪。二乘心住涅槃。棄利樂事。佛乃出世。以大法而啓導之。令其究竟出離耳。中間四句。正示所以啓導之法。初二句於心性上啓導。如其心性而觀察者。隨緣名心。卽第八賴耶。令依賴耶正埋量而觀察之。是唯心識觀。卽起信生滅門也。不變名性。卽如來藏性。依如來藏性正埋量而觀察之。是真如實觀。卽真如門也。夜摩偈云。應觀法界性。一切唯心造。是也。畢竟推求不可得者。謂究竟窮極。復還一心。則能觀之智。所觀之理。當體寂滅。皆不可得。上句信解。下句證入。所謂離念境界。唯証相應也。次二句於諸法

上啓導。梵行品云。知一切法。卽心自性。謂世出世間。凡聖染淨一切諸法。皆是真性緣起。無自體性。卽是真如。若真如上見。有一法可得。卽是有餘。若有一法不是真如。則真如有不徧之處。卽是欠也。故信心銘云。圓同太虛。無欠無餘。又以五教言之。依心觀察。是大乘始教。依如來藏性觀察。終教。畢竟推求不可得。頓教。知一切法無體性。卽是真如。具十玄六相。乃圓教義也。後二句結歸迴向之義。如是淨眼。卽上四句。謂能依此法門觀察證入。是清淨智眼也。迴向有三。實際佛果。具上四句內。此但迴向衆生。謂凡小衆生。無量劫來。闔閉二種生死牢獄。無由得出。諸佛出世。示大法門。直下卽開也。噫。死生大矣。智者可不於此求出路哉。

雖令諸有悉清淨

亦不分別於諸有

知諸有性無所有

而令歡喜意清淨

於一佛土無所依

一切佛土悉如是

亦不染著有爲法

知彼法性無依處

以是修成一切智

以是無上智莊嚴

以是諸佛皆歡喜

是爲菩薩迴向業

菩薩專心念諸佛

無上智慧巧方便

如佛一切無所依

願我修成此功德

〔疏〕後四頌迴向行成。

專心救護於一切

令其遠離衆惡業

如是饒益諸羣生

繫念思惟未曾捨

住於智地守護法

不以餘乘取涅槃

唯願得佛無上道

菩薩如是善迴向

不取衆生所言說

一切有爲虛妄事

雖復不依言語道

亦復不著無言說

十方所有諸如來

了達諸法無有餘

雖知一切皆空寂

而不於空起心念

以一莊嚴嚴一切

亦不於法生分別

如是開悟諸羣生

一切無性無所觀

〔疏〕頌迴向所爲可知

論已上頌有五十行。兩行一頌。皆頌當位之中。迴向所行之行。如文自具。不煩更釋。如文行之第二。隨文解義者。云何爲不壞。迴向雖隨生歿。海不壞法身。雖隨分別而不壞。無作。雖隨諸見而不壞。法眼。雖隨順諸行而不壞。菩提心。雖教化成熟衆生。皆至佛果。不壞身心。無依住門。雖隨一切衆生。知根同事。而不壞戒體。恒自白淨。是故名爲不壞。迴向。又一切世間出世間法。無成壞體。此迴向體。如經云。如實法印。印諸業門。得法無生。住佛所住。觀無生性。印諸境界。諸佛護念。發心迴向。與諸法性。

相應迴向。入無作法成就所作方便迴向。此是不壞迴向之大體也。智不壞。生歿不壞。大願不壞。大悲不壞。皆如實故。如十住位。以離染大悲爲戒體。卽以海門國海雲比丘爲所表。十行位中。卽以工巧竿術以爲戒體。卽以釋天童子於河渚中竿印法以爲所表。爲明行爲河流歸海故。十迴向中。以處俗大悲爲戒體。卽以海師自在爲所表。

第二迴向竟

○第三等一切佛迴向。長行亦二。先位行。後位果。前中亦三。初標名。

佛子。云何爲菩薩摩訶薩等一切佛迴向。

〔疏〕標名者。若準次文。但等二世諸佛迴向之道。準下亦等善根。故文云。如過去佛所行一切善根。我亦如是故。本業亦云。三世諸佛善。一切時行。兼顯無間。故下文云。與妻子俱。未曾暫捨菩提之心。此從所等立名。卽等一切佛之迴向。以深入法性。行普門善而爲其性。鈔兼顯無間者。上引本業。但證等善根。以云一切時行。故云無問。此從所等下。結得名。從以深入下。出體性。

〔論〕第三等一切佛迴向。以忍波羅密爲體。餘九爲伴。表法中。以善財童子所見可樂城東大莊嚴幢。

無憂林中無上勝長者是也。爲城名可樂。依王所
行之行立其名故。爲明得法成忍。人見可樂。在城
東者。爲明忍爲覺行之首。爲表東方角亢氏房之
位。王衆善之首。房爲青龍。王吉慶位故。以東方爲
陽。爲生萬物之首。明忍爲萬行之首。生衆福故。故
居城東也。大莊嚴幢者。忍隨違境不動。是幢義。無
憂林者。明忍成行滿。如林廣蔭也。無上勝者。衆行
之中。不勝忍也。以無忍不成行故。餘廣如經說。

○二依徵廣釋中二。先總標舉

佛子。此菩薩摩訶薩。隨順修學去來現在諸佛世尊。

迴向之道

〔疏〕卽釋名也。

○後廣釋亦二。先顯迴向。後明成益。前中又二。先等隨相。後等離相。前中復二。先明對境善根。以將迴向。後總攝萬善。以將迴向。前中又二。初所迴善根。後正顯迴向。今初。

如是修學迴向道時。見一切色。乃至觸法。若美若惡。不生愛憎。心得自在。無諸過失。廣大清淨。歡喜悅樂。離諸憂惱。心意柔軟。諸根清涼。

〔疏〕謂學佛修時。於六境違順。成四淨心。一於順違。

成就行捨。不爲境牽。名心自在。二異於凡小。以悲
智廣大。淨諸惑故。三離憂過故。有喜樂捨。無憂苦
惱。四禪定輕安故。心意柔輒。不妄取境。故諸根清
涼。

○第二正迴向中。迴向五乘之境。文分五段。一佛
二菩薩。三有善衆生。四二乘。五有惡衆生。今初
佛子。菩薩摩訶薩。獲得如是安樂之時。復更發心迴
向諸佛。作如是念。願以我今所種善根。令諸佛樂轉
更增勝。所謂不可思議佛所住樂。無有等比。佛三昧
樂。不可限量。大慈悲樂。一切諸佛解脫之樂。無有邊

際大神通樂。最極尊重。大自在樂。廣大究竟無量力樂。離諸知覺寂靜之樂。住無礙住。恒正定樂。行無二行。不變異樂。

〔疏〕文二。先牒前起後。後願以我下。正顯所願。初總願樂增。然佛德已圓。今願增者。尊重荷恩。展誠敬故。亦猶獻芹於上。香華奉佛。非彼須待。鈔然佛德已圓下。顯文意。亦是通難。先出難。從尊重荷恩下釋。亦猶獻芹者。卽外典中事。野老美之。而獻於君。君豈美之。所謂下別。文有十句。初句望九。亦是總句。具下諸住。故由此名不思議。一卽天住。謂海印等。二卽梵住。四卽聖住。謂無邊解脫等。五種類俱生無作行。

通。卽天任等者。智論云。天任。謂四禪。聖任。謂三解脫。梵任。謂四無量。皆通三乘。今皆約一乘果位。故皆無量。五種類等者。卽三種意生身中。第三從十地得。至佛亦同。但增勝耳。而非生處。但取變化身耳。三種之義。六十自在樂。或八自在我。或八自在。卽涅槃。二十三經云。一能示一身。以爲多身等。二示一塵身。滿三千界。三能以滿三千界身。飛舉過二十。恒河沙等世界。而無障礙。四心自在。故而得自在。云何自在。如來一心安住不動。身化無量類。形等五根自在。一根見色聞聲等。六七智用無邊。以自在。故得一切法。謂無得而得等。七說自在。故謂說。一八離覺圓寂。八如來。徧滿一偈義。經無量劫等。九空之性。不可得見。廣釋如彼。皆明無得無作。而有所成。故云自在。今但畧列而已。十大用。

○二廻向菩薩

恒湛十二行永亡。二行永亡者。卽上二十一種功德第一。已如前辯。

佛子。菩薩摩訶薩。以諸善根。迴向佛已。復以此善根。迴向菩薩。所謂願未滿者。令得圓滿。心未淨者。令得清淨。諸波羅蜜未滿足者。令得滿足。安住金剛菩提之心。於一切智。得不退轉。不捨大精進。守護菩提門。一切善根。能令衆生捨離我慢。發菩提心。所願成滿。安住一切菩薩所住。獲得菩薩明利諸根。修習善根。證薩婆若。

疏亦二。初結前生後。後所謂下。正顯有十。前六自行。後四利他。前中通有三義。一通相辯。隨願行等。而滿故。二究竟滿故。三從次滿。鈔從次滿者。此義該下諸句。卽次第

滿初信中。隨緣之願。如淨行品。二淨十住。解心。故
晉經云。未淨直心者。三成十行。四成十向。故菩薩
戒。名十金剛。五得初地。已上證不退。故六得八地
已上無功用行。名大精進。任運了一切法。名護菩
提門善根。初句信滿。二十住滿。故晉經云。未淨直
心。證成此句。是任義。十住直心。增故。故
云。心未得淨。後能令衆生下。四利他中。初令證發
者。令得清淨。二我故。二徧安諸地。三通得地中之德。四令
證佛果。

○三迴向有善衆生

佛子。菩薩摩訶薩。以諸善根。如是迴向菩薩已。復以

迴向一切衆生願一切衆生所有善根乃至極少一
彈指頃見佛聞法恭敬聖僧彼諸善根皆離障礙念
佛圓滿念法方便念僧尊重不離見佛心得清淨獲
諸佛法集無量德淨諸神通捨法疑念依教而住

[疏]亦是迷真實義愚衆生有於少善但爲求有處
人天乘今令任佛乘以成十益初三令念三寶次
三念已成德後三由德成益各如次配佛法僧寶
念佛三昧能發通故鈔各如次配者如云不離見
佛卽由前念佛圓滿所成等
淨諸神通卽是常見佛益由此句似
隱故疏釋云念佛三昧能發通故

○四迴向二乘

如爲衆生如是迴向。爲聲聞辟支佛迴向亦復如是。

疏然衆生於佛法易反復。故先迴向之一。乘終竟

迴心。故亦不捨。例前成益。鈔於佛法易反復者。卽淨名第二。凡夫於佛法

有反復而聲聞無也。以聲聞斷結。故下云終竟迴心。揀異定性。下當廣引。

○五爲於有惡

又願一切衆生。永離地獄餓鬼畜生閻羅王等一切惡處。增長無上菩提之心。專意勤求一切種智。永不毀謗諸佛正法。得佛安樂。身心清淨。證一切智。

疏謂不遺闡提。亦是迷異熟愚衆生。不見苦果。故初令離苦果。成因善。後永不下。令離惡因。成當果。

鈎亦是迷異熟愚衆生者。對前迷勝義愚亦如前釋。上來五段初一迴向菩提。餘四迴向衆生。

○第二總攝萬善迴向中二。先總顯其相。後歷事

別陳。今初

佛子。菩薩摩訶薩所有善根。皆以大願發起。正發起。積集。正積集。增長。正增長。悉令廣大。具足充滿。

〔疏〕所有善根。卽所發起等也。皆以大願。卽能發起等也。別有三句。一未生善根。以大願方便發起。令生。故晉經以發起爲行。二亦以大願積集。令多。三隨已生善。一一增勝。令充佛地。而皆有重句。云正

發起等者。謂隨發起。積集增進。必向三處。不餘趣。求離諸過失。名之爲正。悉令已下。總結成益。由正發等故。令稱悲智。故名廣大。由發起積集故。諸善具足。由增長故。一一充滿法界。等於如來。無善不爾。故云悉令。

○第二歷事別陳。諸善非一。畧舉一兩。以顯隨緣攝善。皆成迴向。文中二。初顯增長迴向。後佛子菩薩爾時下。明積集迴向。其發起迴向。通在二處。前段亦是。大悲隨順。後段以明大悲深重。此約善根。若據迴向。前明迴向菩提。爲衆生故。後

迴向衆生。令得菩提。皆是綺互。欲顯一時迴向
三處耳。今初增長中分二。先別明後菩薩如是
下。總結前中二。初明隨染無汙迴向。

佛子。菩薩摩訶薩。在家宅中。與妻子俱。未曾暫捨菩
提之心。正念思惟。薩婆若境。自度度彼。令得究竟。以
善方便。化已眷屬。令入菩薩智。令成熟解脫。雖與同
止心無所著。以本大悲。處於居家。以慈心。故隨順妻
子。於菩薩清淨道。無所障礙。

〔疏〕以慈故隨染。以智故居清淨道。念薩婆若。

○二動與道合迴向。徧而無間。

菩薩摩訶薩。雖在居家作諸事業。未曾暫捨一切智
心。所謂若著衣裳。若噉滋味。若服湯藥。澡漱塗摩。迴
旋顧視。行住坐卧。身語意業。若睡若寤。如是一切諸
有所作。心常迴向薩婆若道。繫念思惟。無時捨離。

○三總顯迴向之相。正顯前文大願發起增長之

義

爲欲饒益一切衆生。安住菩提無量大願。攝取無數
廣大善根。勤修諸善。普救一切。永離一切憍慢放逸
決定。趣於一切智地。終不發意向於餘道。常觀一切
諸佛菩提。永捨一切諸雜染法。修行一切菩薩所學。

於一切智道無所障礙。住於智地愛樂誦習。以無量智集諸善根。心不戀樂一切世間。亦不染著所行之行。專心受持諸佛教法。

〔疏〕文中二先總明。初句標意。安住下。卽能發起願。攝取下。所起所增善根。普救一切。卽結成正義。二永離下。別顯。文有十句。一離惑故。二正趣向故。三不取餘道故。四正觀故。五捨離染故。六具修因故。七於菩提因捨二障故。八持誦智地。九以智習善。十不染世行。受出世法。十皆自德能向菩提。若以上普救一切貫之。則十皆爲生。令得此善。鈔謂離惑故者。

即永離一切僑慢放逸放逸衆惑之根僑爲染法
所依慢能長淪生歿故離此二諸惑皆離餘可思
準

○二總結

菩薩如是處在居家普攝善根令其增長迴向諸佛
無上菩提

疏結中以此文證釋增長義理甚分明

○第二明積集迴向中二初別明後總結前中二
初明微細積集後長時積集今初

佛子菩薩爾時乃至施與畜生之食一搏一粒咸作
是願當令此等捨畜生道利益安樂究竟解脫永度

苦海永滅。苦受永除。苦蘊永斷。苦覺苦聚苦行苦因。苦本及諸苦處。願彼衆生皆得捨離。菩薩如是專心繫念一切衆生。以彼善根而爲上首。爲其迴向一切種智。

〔疏〕前中亦二。先明所積善根。下至一搏一粒。其福至微。施與畜生。其田至劣。積此微善。亦以大願。令正發起。成迴向行。二明迴向行。先總明離苦得樂。次永度已下。別彰離苦。文有九句。初總顯深廣。次八別明苦相。受卽苦之自性。蘊卽苦依。謂五盛陰。苦覺謂苦相。亦攝冤會愛離等覺聚。謂生老病死。

三苦八苦。行卽罪業。因卽諸惑。本卽貪欲。處卽三塗。乃至變易所依。皆得捨離。通後五句。後菩薩如是下總結。令得菩提。

鈔初總顯深廣者。爲苦海故。餘可思準。本卽貪欲者。法華

第二二云。諸苦所因。貪欲爲本。

○第二長時積集

菩薩初發菩提之心。普攝衆生。修諸善根。悉以迴向。欲令永離生死曠野。得諸如來無礙快樂。出煩惱海。修佛法道。慈心徧滿。悲力廣大。普使一切得清淨樂。守護善根。親近佛法。出魔境界。入佛境界。斷世間種。植如來種。住於三世平等法中。

疏長時積集者。從初發心卽積集故。文中二先總標善根迴向。後欲令下明迴向意。卽是迴向之相。以欲令之言。是心願故。文有十三句。前十二爲六對得隨相益。後一句入平等理益。前中一離苦果得滅樂。二出集因修正道。三具悲智。成上修道。四護善近佛。則出煩惱海。餘二對共成初對。

○第二總結

苦薩摩訶薩。如是所有已集當集現集善根。悉以迴向。

疏結中。一搏一粒等。卽現集也。初發心來。卽已集。

也。當集之善。雖則未起。願力逆要起。必任運注向三處。况依此教。九世圓融。先等隨相迴向竟。

○第二等佛離相迴向。卽向實際。統於前二說。有前後行在一心。文二。初等過去。後佛子下等現未前中二。先舉所等。後顯於能等。今初。

復作是念。如過去諸佛菩薩所行恭敬供養一切諸佛。度諸衆生。令永出離。勤加修習一切善根。悉以迴向而無所著。所謂不依色。不著受。無倒想。不作行。不取識。捨離六處。不住世法。樂出世間。知一切法皆如虛空。無所從來。不生不滅。無有真實。無所染著。遠離。

一切諸分別見。不動不轉。不失不壞。住於實際。無相離相。唯是一相。如是深入一切法性。常樂習行。普門善根。悉見一切諸佛衆會。

疏前中三。初標隨相。卽有離相。故末句云。而無所著。次所謂下。別顯離相之相。三如是深入下。結其無礙。二中先離妄契止。初蘊次處。不住世法。卽十八界。有根境識。是世間故。不依不著。卽是出世。後知一切下。釋前不著。所以不著者。由見實成觀故。初句是喻。無所從下。文合法喻。但觀所喻。能喻可知。皆由從緣無性故。無來等五句。展轉相釋。故上

文云。一切法無來。是故無有生等。遠離已下。結其成觀。心無分別。故寂然不動。外緣不轉。不失於照。不壞於止。故與實際相應。實際謂何。卽是無相。何名無相。體離十相。唯是一相。一相謂何。卽是無相。又無相約理。本自無故。離相約智。離取相故。唯是一相。心境冥故。鈔一切法無來等者。此上半以無來釋無生而言等者。等取下半云。以生無有故。滅亦不可得。此以無生釋無滅也。不滅故。無有真實。有實則有可滅。故無實故。無染。譬如雲霧不能染空。故云五句展轉相釋。何名無相等者。涅槃三十一云。大般涅槃名爲無相。師子吼問。何名無相。善男子。無十相。故何等爲十。所謂色相。聲相。香相。味相。觸相。生住壞相。男相。女相。是名十相。無如是相。故名無相。又無相約理下。上之四義展轉相承。唯明一體。此下分能所證。以爲無相。

離相。能所契合。以爲一相。三如是深入下。結無礙。則實際爲總。下三別明。者。既稱法性。修隨相故。一攝一切。名替門善。悉見諸佛。畧辨成益。

○二顯能等

如彼過去一切如來善根迴向。我亦如是而爲迴向。解如是法。證如是法。依如是法。發心修習。不違法相。知所修行。如幻。如影。如水中月。如鏡中像。因緣和合之所顯現。乃至如來究竟之地。

〔疏〕此顯能等中二。先牒所等。總顯能等。二解如是下。別顯等相。初二句。願等佛解證。次二句。依之修。

行。不違已下。顯修行相。至究竟地。卽是修果。

○第一等現未

佛子。菩薩摩訶薩復作是念。如過去諸佛修菩薩行時。以諸善根如是迴向。未來現在。悉亦如是。我今亦應如彼諸佛如是發心。以諸善根而爲迴向。第一迴向。勝迴向。最勝迴向。上迴向。無上迴向。無等迴向。無等等迴向。無比迴向。無對迴向。尊迴向。妙迴向。平等迴向。正直迴向。大功德迴向。廣大迴向。善迴向。清淨迴向。離惡迴向。不隨惡迴向。

〔疏〕分三。初牒所等。卽舉過去。例於現未。次我今下。

總顯能等。三第一下。別明等相通能所等。前過去章中已廣顯離相。今此文內直歎殊勝。義存影畧。不欲繁文。有十九句。晉經具二十句。謂廣大下。有明淨迴向。今譯謂同清淨。故闕此一。於中初九形對辨勝。初總明首出。故名第一。二越凡小故。三超因位故。四獨出故。五無加過故。六無與齊故。七唯至極無二者。可齊等故。八無匹故。九無敵故。後十約自體顯勝。一尊。可貴重故。二妙者。言思不及故。三稱理無差故。四不餘趣向故。五攝德故。六周法界故。舊云大願。七離無記故。八離垢染故。九自無

惡行故。十不隨惡緣故。上來正顯迴向竟。

○第二明迴向成益

菩薩如是以諸善根正迴向已。成就清淨身語意業。住菩薩住。無諸過失。修習善業。離身語惡心無瑕穢。修一切智住廣大心。知一切法無有所作。住出世法。世法不染。分別了知無量諸業。成就迴向善巧方便。永拔一切取著根本。佛子。是爲菩薩摩訶薩第三等一切佛迴向。

疏文顯可知

○第二位果

菩薩摩訶薩住此迴向。深入一切諸如來業。趣向如來勝妙功德。入深清淨智慧境界。不離一切諸菩薩業。善能分別巧妙方便。入深法界。善知菩薩修行次第。入佛種性。以巧方便分別了知無量無邊一切諸法。雖復現身於世中生。而於世法心無所著。

〔疏〕畧辨十種勝德。一因修佛業以等佛迴向故。迴向衆生是佛業故。又如離世間品十種佛業。二趣佛果德向菩提故。三智入深理向實際故。餘可知。

〔鈔〕又如離世者。卽五十八經二云。所謂隨時開導是佛業。令正修行故。夢中令見是佛業。覺昔善根故。爲他演說所未聞經是佛業。令生智斷疑故等。恐繁且止。

○第二偈頌

爾時金剛幢菩薩承佛神力。普觀十方卽說頌言

彼諸菩薩摩訶薩

修過去佛迴向法

亦學未來現在世

一切導師之所行

〔疏〕二十四偈分三。初二十一頌。頌前位行。次二位果。後一結歎。前中二。初一頌。總標釋名。

於諸境界得安樂。

諸佛如來所稱讚。

廣大光明清淨眼。

悉以迴向大聰哲。

菩薩身根種種樂。

眼耳鼻舌亦復然。

如是無量上妙樂。

悉以迴向諸最勝。

〔疏〕後二十偈。頌上廣釋。亦二。先十九頌。正明迴向。後一頌成益。前中隨相離相。雙頌。文中亦二。初六頌對境所生善根迴向。於中初二偈。頌所迴善根。兼迴向佛樂。

一切世間衆善法

及諸如來所成就

於彼悉攝無有餘

盡以隨喜益衆生

世間隨喜無量種

令此迴向爲衆生

人中師子所有樂

願使羣萌悉圓滿

一切國土諸如來

凡所知見種種樂

願令衆生皆悉得

而爲照世大明燈

菩薩所得勝妙樂

悉以迴向諸羣生

雖爲羣生故迴向

而於迴向無所著

〔疏〕後四頌迴向衆生。令得佛安樂。

菩薩修行此迴向

興起無量大悲心

如佛所修迴向德

願我修行悉成滿

如諸最勝所成就

一切智乘微妙樂

及我在世之所行

諸菩薩行無量樂

示入衆趣安隱樂

恒守諸根寂靜樂

悉以迴向諸羣生

普使修成無上智

非身語意卽是業

亦不離此而別有

但以方便滅癡冥 如是修成無上智

〔疏〕二有三偈。頌總攝萬善迴向。分三。初四頌增

長迴向

菩薩所修諸行業 積集無量勝功德

隨順如來生佛家 寂然不亂正迴向

十方一切諸世界 所有衆生成攝受

悉以善根迴向彼 願令具足安隱樂

不爲自身求利益 欲令一切悉安樂

未曾暫起戲論心 但觀諸法空無我

〔疏〕二有三偈。頌積集迴向

十方無量諸最勝

所見一切真佛子

悉以善根迴向彼

願使速成無上覺

一切世間含識類

等心攝取無有餘

以我所行諸善業

令彼衆生速成佛

無量無邊諸大願

無上導師所演說

願諸佛子皆清淨

隨其心樂悉成滿

普觀十方諸世界

悉以功德施於彼

願令皆具妙莊嚴

菩薩如是學迴向

心不稱量諸二法

但恒了達法無二

諸法若二若不二

於中畢竟無所著

十方一切諸世間

悉是衆生想分別

於想非想無所得

如是了達於諸想

〔疏〕三六偈。却頌上對境善根。迴向菩薩。迴文前却。初四隨相。後二離相。於中初偈達法際。一與不二。相待皆寂。後偈了妄源。以想遣境。境盡想亡。非想遣想相待俱寂。寂而常照。方名了想。

彼諸菩薩身淨已

則意清淨無瑕穢

語業已淨無諸過

當知意淨無所著

一心正念過去佛

亦憶未來諸導師

及以現在天人尊

悉學於其所說法

三世一切諸如來

智慧明達心無礙

爲欲利益衆生故

迴向菩提集衆業

彼第一慧廣大慧

不虛妄慧無倒慧

平等實慧清淨慧

最勝慧者如是說

疏此四偈。一偈頌成益。兩偈頌位果。後頌結歎。可知。

論已上有四十八行頌。兩行一頌。所頌前法。如文具明。不煩更解。第二隨文釋義者。何故名爲等一切佛。迴向。爲此第三迴向。成其忍。明無貪瞋癡。三業如佛。佛所行願。皆悉願爲。故云等一切佛。迴。

向令願行一如佛故。又前云不壞迴向。以次等一切諸佛迴向。明次第合然。第三迴向竟。

○第四至一切處迴向。長行亦二。先位行。後位果。前中亦三。謂牒釋結。今初牒名徵起。

佛子。云何爲菩薩摩訶薩至一切處迴向。

〔疏〕至是能至善根及其供具。一切處卽所至供境。謂以大願令此善根供具徧至一切時處。隨所應供。供諸福田。本業云。以大願力入一切佛國中。供養一切佛故。然準下文。若因若果。皆至一切。畧舉十事。一法身至一切處。如來藏身。普周徧故。二法

身至故智身至。三智身至故大願至。四大願至故
供具善根至。五則見佛聽聞至。六則現身開悟至。
七則無來無去至。八則不出一毛孔而能至。九則
一身一毛等一切身毛至。十則一念等一切劫至。
若尅陳別體則以供佛善根及勝解心爲體。通則
該於法界。

〔論〕第四至一切處迴向者。以精進波羅密爲體。餘
九爲伴。以善財所見比丘尼名師子頻伸。住輸那
國。此曰勇猛。城名迦陵迦林。此云鬪諍時也。明此
比丘尼能和斷鬪諍。此表第四迴向行精進業利。

物之相。表比丘者。明離染清淨。尼者。慈音。明此精
進行門。離染慈悲以爲行體。號師子。嘯伸者。明已
得四無礙智。已得四種無畏。故師子者。明智無畏
也。嘯伸者。卷舒自在也。明以清淨大智勇猛自在
卷舒。說法利生善和斷鬪諍。皆悉從伏。無量諸衆
生見聞不同。廣如經說。意表此第四迴向中行精
進之行。表智悲之相。故無染慈悲。說法自在。表悲
常隨苦流。智常無染。是摩尼義。四無礙智者。一義
無礙智。二法無礙智。三辭無礙智。四樂說無礙智。
四無畏者。一一切智無畏。二漏盡無畏。三說障道

無畏四說盡苦道無畏

○第二依徵廣釋中三初迴向衆生菩提二迴向實際三結歎成益前中二初畧明後廣顯今初佛子此菩薩摩訶薩修習一切諸善根時作是念言願此善根功德之力至一切處譬如實際無處不至至一切物至一切世間至一切衆生至一切國土至一切法至一切虛空至一切三世至一切有爲無爲至一切語言音聲願此善根亦復如是徧至一切諸如來所供養三世一切諸佛過去諸佛所願悉滿未來諸佛具足莊嚴現在諸佛及其國土道場衆會徧

滿一切虛空法界。願以信解大威力故。廣大智慧無障礙故。一切善根悉迴向故。以如諸天諸供養具而爲供養。充滿無量無邊世界。

〔疏〕前中三謂法喻。合法中。謂以願力及善根力。此二相資。故能徧至。次譬如下。喻況中。實際者。卽一切法真實之際。故無不在。一切物者。謂凡是有形。故晉經中名一切有。餘竝可知。此與如相及法界迴向有差別者。此據善根迴向成供具至一切處。第八約善根迴向。同如體相業用。第十約所迴向行。廣多無量。故無濫也。第三以法合中。先總後過。

去下別明於中。二先舉三世合所至處。能事已畢。過云願滿。修因已圓。未云具足現成正化。故云國土道場。後願以信下。明能至供於中。先成供因。因有三種。一以勝解則隨心轉變。二以大智了無障礙。三以善根迴向稱願而成。以如諸下辨所成供。可知。

○第二廣明於中。二先約十方佛明其徧至。後約常住佛明其徧至。前中分三。初總明供處。二別明供養。三通顯迴向之心。今初。

佛子。菩薩摩訶薩。復作是念。諸佛世尊。普徧一切虛。

空法界。種種業所起。十方不可說一切世界。種世界。不可說佛國土。佛境界。種種世界。無量世界。無分齊世界。轉世界。側世界。仰世界。覆世界。

〔疏〕先約處顯多。次種種業所起。約因顯多。十方已下。約數顯多。種種世界。約形類顯多。義通受用及變化土。

○二別明供養

如是一切諸世界中。現住於壽。示現種種神通變化。彼有菩薩。以勝解力。爲諸衆生。堪受化者。於彼一切諸世界中。現爲如來。出興於世。以至一切處。智普徧。

開示如來無量自在神力。法身徧徃無有差別。平等普入一切法界。如來藏身不生不滅。善巧方便。普現世間。證法實性。超一切故。得不退轉。無礙力故。生於如來無障礙見。廣大威德。種性中故。佛子。菩薩摩訶薩。以其所種一切善根。願於如是諸如來所。以衆妙華。及衆妙香。鬘蓋幢幡。衣服燈燭。及餘一切諸莊嚴具。以爲供養。若佛形像。若佛塔廟。悉亦如是。

〔疏〕文二。初供現在佛。後若佛形像下。供住持佛。前中二。先所供田。後佛子下。明能供行。前中二。初實報田。二彼有下。辨權應田。於中三。初現身。次說法。

言以至一切處智者。意明今此位菩薩亦能爾也。此卽本下迹高。若佛爲菩薩則本高迹下。或俱高俱下。因果交徹。思之。鈔或俱高俱下者。畧成四句。爲菩薩。本迹俱下。就菩薩中。以位相望。亦有高下。可知。三法身下。釋權佛所由。初之三句。顯與果佛平等同性起故。一得法性身。同徧往故。二等有智身。入法界故。三普賢自體。如來藏身不生滅故。由上三義。故能善巧。普現世間。若爾。衆生豈無如來藏身。故下三句。復釋成前義。一證法實故。得同法身。二有無礙智力故。普入法界。三佛種中生故。得如來藏身之用。謂絕二障。

權實無礙。是如來見。廣大威德。是如來用。菩薩隨
順悟入。是生彼種性之中。故出現品云。若得聞此
如來無量不思議無障礙智慧法門。聞已信解。隨
順悟入。當知此人。生如來家。廣如彼說。得斯後三。
因位尚卽爲果。况應現耶。上亦供行所因。上亦供
者。卽上釋權化所由。以如來藏
等力故。令供行至。故爲所因。二明供行。及供任
持佛等。文竝可知。

○三通顯迴向之心

以此善根如是迴向。所謂不亂迴向。一心迴向。自意
迴向。尊敬迴向。不動迴向。無住迴向。無依迴向。無衆

生心迴向。無躁競心迴向。寂靜心迴向。

〔疏〕初句總牒善根迴向。後所謂下。別顯行相。謂前以善根迴向成供。供諸田時。如是用心。文有十句。一不生妄念。二專注正境。三不由他悟。四於田殷重。五違順不動。六不任於法。七不依於境。八知我空。九心行安審。十正順涅槃。

○第二約常住佛明徧至者。謂三世住壽。盡未來際。應亦常也。三身十身融無礙故。不同前文有塔廟等。文中有三。初以善根迴向供佛。二願令一切下。以供佛善迴向衆生。三譬如下。總願善

根音攝迴向。初中二。先所供境。後顯能供行。今

初

鈔三身十身融。故者。出應亦常所以。若法相說。應雖各常。是不斷常。今法性宗。同是一常。

若別說者。法身無始無終。報身有始無終。化身有始有終。今化即法。故無始終。况報同法。亦無

有始。十身融義。居然可知。

復作是念。盡法界。虛空界。去來現在一切劫中。諸佛世尊。得一切智成。菩提道無量名字。各各差別。於種種時。現成正覺。悉皆住壽。盡未來際。一一各以法界莊嚴而嚴其身。道場衆會。周徧法界。一切國土。隨時出興。而作佛事。

〔疏〕盡空法界。明處無不徧。去來現劫。時無不窮。諸

佛世尊。總該真應。得一切下。明真極之成。於種種時下。明應現成。成卽有始。應乃無終。故皆任壽盡未來際。真應無二。故一一各以法界莊嚴。主伴圓通。故道場衆會。皆周法界。出非在我。故曰隨時。興必利生名作佛事。

○二顯能供行

如是一切諸佛如來。我以善根。普皆迴向。願以無數香蓋。無數香幢。無數香旛。無數香帳。無數香網。無數香像。無數香光。無數香燄。無數香雲。無數香座。無數香經行地。無數香所住處。無數香世界。無數香山。無

數香海。無數香河。無數香樹。無數香衣服。無數香蓮
華。無數香宮殿。無量華蓋。廣說乃至無量華宮殿。無
邊髮蓋。廣說乃至無邊髮宮殿。無等塗香蓋。廣說乃
至無等塗香宮殿。不可數末香蓋。廣說乃至不可數
末香宮殿。不可稱衣蓋。廣說乃至不可稱衣宮殿。不
可思寶蓋。廣說乃至不可思寶宮殿。不可量燈光。明
蓋。廣說乃至不可量燈光。明宮殿。不可說莊嚴具蓋。
廣說乃至不可說莊嚴具宮殿。不可說不可說摩尼
寶蓋。不可說不可說摩尼寶幢。如是摩尼寶幡。摩尼
寶帳。摩尼寶網。摩尼寶像。摩尼寶光。摩尼寶燄。摩尼

寶雲。摩尼寶座。摩尼寶經行地。摩尼寶所住處。摩尼寶刹。摩尼寶山。摩尼寶海。摩尼寶河。摩尼寶樹。摩尼寶衣服。摩尼寶蓮華。摩尼寶宮殿。皆不可說不可說。如是一一諸境界中。各有無數欄楯。無數宮殿。無數樓閣。無數門闥。無數半月。無數却敵。無數牕牖。無數清淨寶。無數莊嚴具。以如是等諸供養物。恭敬供養如上所說諸佛世尊。

〔疏〕能供行中三。初結前生後。二願以下。所成供具。三以如是下。結成供行。二中三。初以香爲蓋等二十事。次無量華蓋下。以華鬘等九例於前香。各具

二十。香等離蓋等更無別體。故有二百。鈔香等離蓋等者如

初以香等爲二十事。但有二十七。無二十一。以香徧

二十。故如刻栴檀爲二十事。豈別有稱檀後花等

九事。各爲後如是一一。下隨彼蓋幢等中。若總相

說皆有楯等九事。成一千八百。并前本門總有二

千。是則香等成蓋等。蓋等有楯等。從無數無量如

是漸增。且至不可說。理實皆等法界。難可稱也。然

一一諸言。定通香等。不全通於蓋等。以衣及光明

何有門闥樓閣等耶。是則都數未必二千。但通相

言。一一諸境界也。三結成供行。可知。

○第二以供佛善根迴向衆生者。正願迴向之願

願令一切世間皆得清淨。一切衆生成得離住十力地。於一切法中得無礙法明。令一切衆生具足善根。悉得調伏。其心無量等。虛空界徃一切刹而無所至。入一切土。施諸善法。常得見佛。植諸善根。成就大乘。不著諸法。具足衆善。立無量行。普入無邊一切法界。成就諸佛神通之力。得於如來一切智智。

疏然前段供後有不亂等心。今此供後明清淨等願者。文有影畧。義實相通。文分爲二。初總顯所爲。謂令得果。惑淨智明。後令一切下別顯願得因圓果滿。初明二利因圓成就已下。智用果滿。

○第三總願善根普攝廻向

譬如無我。普攝諸法。我諸善根。亦復如是。普攝一切諸佛如來。咸悉供養。無有餘故。普攝一切無量諸法。悉能悟入。無障礙故。普攝一切諸菩薩衆。究竟皆與同善根故。普攝一切諸菩薩行。以本願力。皆圓滿故。普攝一切菩薩法明。了達諸法。皆無礙故。普攝諸佛大神通力。成就無量諸善根故。普攝諸佛力無所畏。發無量心滿一切故。普攝菩薩三昧辯才陀羅尼門。善能照了無二法故。普攝諸佛善巧方便。示現如來大神力故。普攝三世一切諸佛降生成道轉正法輪。

調伏衆生入般涅槃。恭敬供養悉周徧故。普攝十方一切世界嚴淨佛刹咸究竟故。普攝一切諸廣大劫於中出現修菩薩行無斷絕故。普攝一切所有趣生悉於其中現受生故。普攝一切諸衆生界具足普賢菩薩行故。普攝一切諸惑習氣悉以方便令清淨故。普攝一切衆生諸根無量差別咸了知故。普攝一切衆生解欲令離雜染得清淨故。普攝一切化衆生行隨其所應爲現身故。普攝一切應衆生道悉入一切衆生界故。普攝一切如來智性護持一切諸佛教故。

疏普攝迴向者。以上來三段別明善根。但說成供

供佛。今欲顯此善根無所不成。故復明此於中。二初喻。謂二無我理。譬攝理事。無不周故。一法合。有二十句。前十二句攝成自利德。後八句成利他。並顯可知。初迴向衆生菩提竟。

○第二實際迴向中。二初總標。二不於下別顯。今初。

佛子。菩薩摩訶薩。以諸善根如是迴向時。用無所得而爲方便。

〔疏〕用無所得爲方便者。畧有二義。一以無所得導前隨相。則涉有不迷於空。爲入有之方便。二假無

得以入有。不存無得。卽此無得。亦是方便。此爲入空之方便也。今文正用前意義。兼於後。欲顯隨相離相。無前後故。然畧云無得。準大般若。亦以無生無滅無任等。皆爲涉有之方便也。

○二別顯中三初正顯觀心。二菩薩如是了達下。明觀成之相。三菩薩如是觀一切下。明觀成益。

今初

不於業中分別報。不於報中分別業。

〔疏〕初中十句。義有四節。初一會事歸理。謂事法既虛。相無不盡。理無不現。故業果皆空。業空故。無體。

可能招報。况謂因中而有果耶。報空故。無體可以
酬因。况謂果中而有因耶。若約觀心。名會用歸寂。
鈔業空下別釋。此有二意。一正以緣生即空。破權
小見。顯業不能為因。招果。果亦不能為果。酬因。二
兼破外道。因中有果等。彼計因中有果者。如乳是
酪。因乳中有酪。成酪之後。亦有於乳。故曰果中有
因。若約觀心者。上約法理。通境及智。今約觀心。但
一。是非。即名為寂。亦無心於事理。方稱為寂。不失
於照。故名為用。不
取用。相。即常用。寂。

雖無分別而普入法界。雖無所作而恒住善根。雖無
所起而勤修勝法。不信諸法而能深入。不有於法而
悉知見。

〔疏〕次五句明理不礙事。約心則寂不礙用。於中初

句理無能所分別。而不礙有能入之智。所入法界。次句無作而造作。次句無起而修起。次句無能所信。而能即事入玄。此與初句。但事理之異。大般若云。若信一切法。則不信一切法。以不信一切法。名信一切法。此約不信是真信。今約不信不礙信。末句不有能所見。而不礙能所見。此與初句者。初今約事上無能入。以諸法即事而能深入。故云。即事入玄。大般若下引此文者。揀義不同。謂般若意却是即用而寂。同上須彌山頂偈云。無見即是見。能見一切法。於法若有見。是則無所見。此偈則先正後反。大般若則先反後正。今此中意。明理不礙事。故意別也。末句不有能所見者。以文言不有於法。法通能所見也。何以得知。知法是能所見。以下句云。悉知見故。即同金剛。如來悉知悉見。

若作不作皆不可得。知諸法性恒不自在。

〔疏〕三有二句。事理雙絕。約心則止。觀兩亡。初句正

釋。作事也。不作理也。待對假言。故皆不可得。下句

釋。成法從緣起。不能不生。諸緣離散。不能不滅。從

緣生滅。不能不有。緣生無性。不能不空。故諸法性

無。躡自在。在何有性。相而可得耶。〔鈔〕待對者。出絕事

謂待事說。理待理說。事知因長有短。短不可得等。二云假言者。諸法寂滅。本絕名言。今云事理皆假

名耳。故皆雙絕。上是疏家釋成。下句經自釋成。

雖悉見諸法而無所見。普知一切而無所知。

〔疏〕四有二句。明事理無礙。約心則寂。照雙流。良以

事虛攬理無不理之事。理實應緣無不事之理所。
 以寂而常照。照而常寂。故終日知見而無知見也。
 上四句初則會有歸空。有未曾損。次依空立有。有
 未始存。次空有兩亡。無隱無顯。後空有無礙。存沒
 同時。四句鎔融。方名離相實際。觀融。上四句下。總
融前四。言有未
習損者。法卽是空。非法滅空。有未始存者。卽空之
有。有相虛故。無隱無顯者。有存則空隱。空存則有
隱。今由兩亡。故非隱顯存沒同時者。空不礙有。故
存。有不礙空。故沒。然隱顯皆就理明。存沒並約事
說。亦影畧耳。四句鎔融下總結。此則非唯
離於隨相。亦離離相。真無礙也。真實際也。

○二觀成之相

菩薩如是了達境界。知一切法因緣爲本。見於一切

諸佛法身。至一切法離染實際。解了世間皆如變化。明達衆生唯是一法。無有二性。不捨業境善巧方便。於有爲界。示無爲法。而不滅壞有爲之相。於無爲界。示有爲法。而不分別無爲之相。

〔疏〕然此段文更有二意。一前是卽觀之止。後明卽止之觀。前雖云知。意明無知。二以後段釋成前文。由知因緣等。故不於業中分別報等。雖有此二觀。成相顯於中分二。初句結前生後。由依如前了達心境。故能成下如是知見。後知一切下。正顯其相。文有八句。初總餘別。總中由上觀。故能知因緣何。

等因緣。謂一切法。若漏無漏。爲無爲等。皆以因緣而爲其本。云何謂本。謂因緣故有。因緣故空。因緣故不有。因緣故不空。因緣故流轉。因緣故還滅。乃至一切。皆由因緣。故中論云。未曾有一法不從因緣生。有爲緣生。無爲緣顯。因有有爲。則有無爲。又形奪相盡。是真無爲。下別有七句釋成上義。由觀因緣得見佛等。是故因緣爲諸法本。一見法身。因緣無住。無住之本。卽是法身。經云。佛以法爲身故。中論云。若見因緣法。則爲能見佛。二見法實際。因緣性離。爲法實故。三無性緣生。故如化似有。四理

外無事。故唯一法。皆如來藏。事事皆虛。故無二性。尚無有二。何況有五。五緣性無礙。故於業境皆得善巧。以業攝報。境必對心。則內外因果皆善巧也。六卽事顯理而不壞事。故云於有爲等。七卽理成事而不隱理。故云於無爲等。若滅壞有爲。則失有爲本空。若分別無爲。卽壞無爲之性。是以若約相卽爲卽無爲。無可滅壞。無爲卽爲亦無可分別。若約無礙。則事能顯理。而非理。理能成事。而非事。事理相卽。性相歷然。故爲無爲體。非一異。示謂顯示有爲界分。無爲界性。

○三觀成之益

菩薩如是觀一切法畢竟寂滅成就一切清淨善根而起救護衆生之心智慧明達一切法海常樂修行離愚癡法已具成就出世功德不更修學世間之法得淨智眼離諸癡翳以善方便修迴向道

〔疏〕文顯可知 二迴向實際究竟

○第三結歎成益

佛子菩薩摩訶薩以諸善根如是迴向稱可一切諸佛之心嚴淨一切諸佛國土教化成就一切衆生具足受持一切佛法作一切衆生最上福田爲一切商

人智慧導師。作一切世間清淨日輪。一一善根充徧法界。悉能救護一切衆生。皆令清淨。具足功德。佛子。菩薩摩訶薩如是迴向時。能護持一切佛種。能成熟一切衆生。能嚴淨一切國土。能不壞一切諸業。能了知一切諸法。能等觀諸法。無二能徧徃十方世界。能了達離欲實際。能成就清淨信解。能具足明利諸根。佛子。是爲菩薩摩訶薩第四至一切處迴向。

〔疏〕上來近明離相之益。今則通辨一迴向益。文中二。先明自分二利益。初句上稱佛心。餘句自成二利。二佛子下。勝進二利益。文兼體用。並顯可知。

○第二大段位果

菩薩摩訶薩住此迴向時。得至一切處身業。普能應現一切世界。故得至一切處語業。於一切世界中演說法故。得至一切處意業。受持一切佛所說法故。得至一切處神足通。隨衆生心悉往應故。得至一切處隨證智。普能了達一切法故。得至一切處總持辯才。隨衆生心令歡喜故。得至一切處入法界。於一毛孔中。普入一切世界。故得至一切處徧入身。於一衆生身。普入一切衆生身故。得至一切處普見劫。一一劫中常見一切諸如來故。得至一切處普見念。一一念

中一切諸佛悉現前故。佛子。菩薩摩訶薩得至一切處迴向。能以善根如是迴向。

〔疏〕位果中三。初牒得時。二得至下。正顯所得。文有十句。初三三業體徧。次三三業用徧。後四顯用自在。在三佛子下總結。

○第二重頌

爾時金剛幢菩薩承佛威力。普觀十方而說頌言。

內外一切諸世間

菩薩悉皆無所著

不捨饒益衆生業

大士修行如是智

〔疏〕有十一偈。分三。初七頌迴向衆生及菩提。次三

偈半頌。迴向實際。後半頌成益。前中二初一偈頌前畧明至一切處。但頌法說所修善根。

十方所有諸國土 一切無依無所住

〔疏〕後六頌前廣明。於中初半偈。通頌前所至處。

不取活命等衆法 亦不妄起諸分別

普攝十方世界中 一切衆生無有餘

觀其體性無所有 至一切處善迴向

〔疏〕次一偈半。頌前迴向衆生。

普攝有爲無爲法 不於其中起妄念

如於世間法亦然 照世燈明如是覺

菩薩所修諸業行

上中下品各差別

悉以善根迴向彼

十方一切諸如來

菩薩迴向到彼岸

隨如來學悉成就

恒以妙智善思惟

具足人中最勝法

清淨善根普迴向

利益羣迷恒不捨

悉令一切諸衆生

得成無上照世燈

〔疏〕後四頌前音攝迴向餘可知

未曾分別取衆生

亦不妄想念諸法

雖於世間無染著

亦復不捨諸含識

菩薩常樂寂滅法

隨順得至涅槃境

亦不捨離衆生道

獲如是等微妙智

菩薩未曾分別業

亦不取著諸果報

一切世間從緣生

不離因緣見諸法

深入如是諸境界

不於其中起分別

一切衆生調御師

於此明了善迴向

論已上有二十二行願兩行一願。如文自具。第二

隨文釋義者。云何至一切處迴向。約位有十一。一
法身至一切處。二智身至一切處。三大願至一切
處。四供養諸佛至一切處。五見聞聽受諸法至一
切處。六徧現色身至一切處。七開悟衆生至一切

處。八不出毛孔至一切處。九徧滿十方。等于法界而無去來。至一切處。十入一衆生身心等一切衆生身心。至一切處。十一入一佛身毛孔等一切佛身毛孔。至一切處。廻向。又廻向者。有十法。一以無作法。廻向。有作法。二以有作法。廻向。無作法。三以一法。廻向。多法。四以多法。廻向。一法。五於諸有法。廻向。無法。六於無法。廻向。有法。七以世間法。廻向。出世間法。八以出世間法。廻向。世間法。九以一切自性。無廻向。以爲方便。有廻向法。十以一切有廻向法。以爲自性。無廻向法。爲令滯有無者。得自在。

故。生。死。涅。槃。無。障。礙。故。得。夫。神。通。無。法。拘。留。故。供。養。諸。佛。教。化。衆。生。一。多。同。別。皆。得。自。在。故。以。誠。實。心。起。大。願。雲。周。覆。法。界。虛。空。界。與。種。種。供。具。供。養。三。世。一。切。諸。佛。皆。願。自。他。福。德。圓。滿。故。是。故。名。爲。至。一。切。處。迴。向。大。意。以。修。得。十。住。十。行。之。中。法。身。理。智。卽。依。此。法。起。大。願。大。悲。依。無。作。理。智。起。神。通。行。使。不。滯。染。淨。不。爲。染。淨。二。法。心。所。拘。留。入。神。通。自。在。門。不。著。神。通。不。著。自。在。爲。神。通。諸。法。性。自。離。故。

第四迴向竟

溫陵笏石寺比丘太願募化四衆同刻
華嚴經十廻向品疏纂要第四十八
伏願衆等植金剛種立菩提因世出世
間同資福慧
康熙二十二年九 日華藏室謹題

大方廣佛華嚴經疏論纂要卷第四十八